

գրեցաք, առաջի եղին հրովարտակս 3, և Հէօճճէթս 8. վասն փակեալ դրան Լատինաց՝ հրովարտակս 2, և Հէօճճէթ 1. վասն Համբարձման տեղւոյն շինութեան, հրովարտակս հին և նոր 5, և Հէօճճէթս հին 3. վասն Գողգոթայի՝ բաց 'ի դաշնագրոց՝ հրովարտակս 3 'ի Սուլթանաց եղիպոտսի, մին թերի, և Հէօճճէթս 2. վասն Քառասնից այրին՝ Հէօճճէթ 1. վասն վանաց Յովհաննու ծընընդեան՝ հրովարտակս 2 'ի Սուլթանացն եղիպոտսի: Իսկ վասն Մարոյ տեղւոյն ասեն թէ՛ այն էր սեփհականութիւն Հայոց՝ և գտեալ պատեհ ժամանակ հնարիւք յափշտակեցին զայն Լատինք. խորտակեցին զարկեղունս և զդարանս յԱյրի անդ, և յափշտակեցին զոր միանգամ գտին 'ի նոսա, բարձին անտի և զկանթեղունս Հայոց, այժմ պահանջեմք զիրաւունս մեր, եւ վասն այնր ունիմք հրովարտակ 'ի Սուլթան Մուսղաֆայէ՛ և Հէօճճէթս 2: Զայսոսիկ վաւերական գրեանս զորս մտտուցին Հայք, զումանց իմաստս, և զոմանս բառ առ բառ օրինակեցին յօրագրի անդ. փակեցաւ Ատեանն:

Այլ մինչդեռ տակաւին 'ի Կոստանդինուպօլիս էր Կիրակոս Եպիսկոպոս, կոչեցին զնա 'ի Նոր Խան 'ի սենեակ Յովհաննէս աղայի, որ էր քուերորդի Բիշմիլեանի, ուր ժողովեալ էին միայն Քեահեայ Ճանիկ, Բիշմիլեան Միքայէլ, և Երկանեան Յարութիւն Ամիրայք. եւ յառանձնութեան անդ տեսին զհաշուոյ տումար ելից և մտից Սուրբ Աթոռոյն, զոր առաքեալ էր Պօղոս Եպիսկոպոս՝ և բարեոք դիտողութեամբ 'ի նկատի առեալ վերահասու եղեն ամենայնի, ուրախ եղեն յոյժ եւ զովեցին զխոհական կառավարութիւն նորին: Ապա հարցին ցնիրակոս Եպիսկոպոս՝ թէ յի՞նչ միտս են գլխաւորք միաբանաց և զի՞նչ կամին առնել զյաւելեալ գումարն: Եւ նա արար պատասխանի՝ յաջողութեամբ Տեառն յաւուրս ձեր ջանիւք նորին Սրբազնութեան ազատեցաւ Աթոռն 'ի պարտուց՝ եւ յաւելաւ ինչ՝ այլ այսպիսի աւուրք յաջողութեան ոչ մնան միշտ. գուցէ 'ի պատահիլ պատերազմաց և այլ ձախորդութեանց, նուազեսցի թիւ ուխտաւորաց՝ յայնժամ հարկ լինի 'ի նեղութեան պահու ձեռն արկանել յայն գումար: Եւ յայսոսիկ երկուս ամս բազում տեղիք շինեցան յերու-